



तुबारि

www.pangi.in
अब अंबेजी, हिन्दी त
पंगवाड़ी भाषा अन्तर असी।

Issue - 093,
April. 2020


नौ रात्री के तुसी सोबी जेई बधे। जुग जुग जीओ लौते, तुस सोब। इस मेहने तुबारी संस्करण तुसी हरालण जे अस सुआ खुश असे। छने पढुण जे एन्हि कथाई त कविताई पुठ चिकिण दिए। वापिस इस पन्ने पुठ एण जे पन्ने पड्डे दुतो **विषय सूची** पुठ चिकिण दिए।
धन्यवाद

क्र.	विषय सूची	पेज
1	कोरोना वाइरस्	2
2	दाँदु कथा	3
3	फियुड़	5
4	कम या फि आराम	6
5	वापस एई गई, निलियार	8
6	चुटकले	11



कोरोना वाइरस

कोरोना नउए यक बिमारी पुरा भुमण डराई रखो असा। जीं तुं डाँक्टर तुसी जे बोता, तुस तेसे बोके माने, त तेंके बोकी के नियांगी माने। जीं से बोते कि 1 घटे बाद हाथ धूण त तीं करे। किस से हें लिए बोलुण लगो असे। ना त अस बी तेस बिमारी शिकार बणी घेन्ते। तुस सोब अपु मुहुँ जोई रुमाल या कुछ होरु लाई रखे, जेसे बेलि कि हें जे थुक या शहाम असु से केसे होरी जे न छुएल। होर अगर अस तेस बिमारी शिकार असे त असी एकेले बुशुण चाहिए, जेसे बेलि कि अस त हें शुई सुसुर त साफ भोल।



तुस हेरण लगो असे कि बाहरी देशी महेणु कीं मरण लगो असे। आजकल हें पांगेई बि सोब धेर बन असु। ए ठीक किओ असु दुकानी बि यक रोज 11:00 बज किया 2:00 तक खोलते। होर ई बी शुणुण अन्तर अओ असु कि पुलिस बाड़ी जे बी कोउं कआ त तेस बठ लोडिया देण लओ असे। तुस बी समोझी कइ बिशे, अगर कुछ कम असु त घिए, ना त ना घिए। तुं छेनेआरे कते कि अपु गी बिशे त साफ सफेई ध्यान रखे। किस कि अगर तुस त तुं परिवार तकड़ा भोल त तुं भेयाड़ तकड़े भुन्ते। होर अगर तुं भेयाड़ तकड़े भोल त तुं ग्रां तकडु भुन्तु। ओं जी अगर तुं ग्रां तकडु भोल त तुं पूरी पंचायत तकड़ी भुन्ति। ई कर कइ पूरा पांगी घाटि त हें देश इस बिमारी केआं लड़ सकता।

विषय सूची

दाँदु कथा

ब्यादी बेहल्लू खाई कइ दाँदू अपु पोतुरु पोतरी जुओई खेलण लगो थिआ। दाँदू बोलु, “बसे गभुरो सुआ खेल छऊ। अब उंघीण दिए।” त गभुरु बोलु, “न दाँदूआ पहेला असि यक कथा शुणा। तोउं अस उंघते ना ता अस न उंघते। ठीक असु, गभुरो! एईए, में भेएइ बिशे, अउं तुसी यक कथा

शुणांता। यक राजा थिआ। से सुआ दाहोपरा त साफ सफेई बाड़ा थिआ। से अपु प्रजाई हर सुख दुखे पूरा ख्याल रखताथ। यक रोज से भेश बदली कइ



अकेले ईं शहर घुमण जे घेई गा। ब्यादा जपल स वापस आ त तेन अपु मन्त्री त नौखर चाखर सोब भिए त शहरे चोहरो कना गन्दगी भुणे बझई जुओई से तेन्हि जे ती लेहरिया।

राजे शहर अन्तर गन्दगी हेर कइ सुआ दुख लगा। राजा जाणताथ कि गन्दगी बेलिए केहि किस्मी बिमारी फैल सकती। राजे तसे टेम सोबी मन्त्री त नौखर चाखरी जे पूरे शहरे साफ सफेई करण जे बोलु। तोउं गभुरु “सचे ना दाँदूआ, राजे साफ सफेई सुआ पसंद थी ना?” “आँ गभुरो। तोउं ईं शुण सोब मन्त्री डर गए त अपफ बुच बोलुण लगे हई पूरे शहरे सफेई असी करीण ना? फि कि भु दाँदूआ? मन्त्री अपफ कीं ना सफेई? तोउं दाँदू बोलु, तेन्हि अपफ त ना कीं। पर यक मन्त्री एढ़ि लिए राजे जे यक सलहा दिती।” “कि सलाह दिती दाँदूआ?

विषय सूची

तेन बोलु, “महाराज! में मनुण असु कि असी हमेशा साफ सफेई ख्याल रखण चाहिए। एसे लिए असी रोज सफेई करीण

महाराज, आज अगर असु सफेई करी बि छड़ियाल त बि शुई फि प्रजाई मेहणु किछ न किछ फट कइ गन्दगी कइ छते। महाराज में सलाह असी



कि तुस पूरी प्रजाई यक टजोट अन्तर भिआई कइ साफ सफेई बारे बताण दिए त तेन्के सुविधाई लिए किछ नौखर-चाखर रखे, साफ सफेई करण जे, जेसे बेलि कि रोज सफेई भुन्ति रिहेला।”

राजे मन्त्री बोक सुआ अब्बल लगी। तोउं राजे यक टजोट करणे बोलु। टजोट अन्तर राजे मेहणु जे साफ सफेई बारे बताऊ त तढ़िया पता शेहर हर टेम चमकण लगा। ठीक बोलु तुसी दाँदुआ गभुरो, इ कथा असी ईं शिक्षा देन्ती कि असी सिर्फ अपु गीहेरी ना बल्कि पूरे शेहरे साफ सफाई ध्यान रखण चाहिए। न त असी गन्द फटाण चाहिए, होर न केसे फटाण देण चाहिए। तोउं दाँदू बोलु “घिए गभुरो, अब उंघीण दिए रात सुआ भोई गई।” गभुरु बोलु “ठीक सी दाँदूआ, तुस बि आराम जुओई उंघीण दिए।”



विषय सूची

धाणि त तसे जुएली केआं अब सते
बंटी अठ फेरे लवाण चाहिए। सत फेरे तेन्के
व्याहे, अठुं जे फेरा असा, से कुई जे लोवाण
चहिए कि से कुई बचान्ते त तेस पढान्ते ।



फियुडु

मोजीकने लगियल बियार मतवाड़ी
मोजीकने लगियल बियार आगी ईं
फियुडु हमेशा मुस्करान्तु।

पन्नी के कल्हाई बिश कइ

फियुडु हमेशा मुस्करान्तु

कंटी के पुणण सेहि सेहि कइ

फियुडु हमेशा मुस्करान्तु

पुठे डई पुठ फुली कइ

फियुडु हमेशा मुस्करान्तु

भीं झड़ी जन अन्तर मिइ कइ

फियुडु हमेशा मुस्करान्तु

रोलुण फियुडु न एन्तु

फियुडु हमेशा मुस्करान्तु

तोउं त से सोबी अबल लगतु

फियुडु हमेशा मुस्करान्तु।



विषय सूची

कम या फि आराम



यक मेहणु ती सुसत थिआ। से यक ई जिन्दगी चहांताथ, जेस अन्तर से बस आराम जोईए बछाण पुठ उंघोरा लौताथ। अतुरु ना! अगर तेस केसे चीजी जरुरत

भोल त से तेस बछाणे पुठ लौति मेओ। तसे एस आदत केआं तसे गीहे बाड़े सुआ परेशान थिए। गीहे बाड़ी तेस सुधारणे लिए तसे कोई इच्छा पूरी न की। यक रोज से मरी गा। मारण केआं पता यमदूत तेस स्वर्ग घिन गे। स्वर्ग सुआ अब्बल थिआ, जेस हेर कइ से सुआ खुश भोई गा। स्वर्गदूते तेस मेहणु तसे गी हरा लु त तेस जे बोलु, “तोउ इठिया कुरेहे बि घेणे जरुरत नेई। सोब किछ तोउ इठि मेई घेन्तु। इ सोब नौखर नौखरणी तें हर यक हुक्म मानते।”

ई शुण कइ से मेहणु सुआ खुश भोई गा त सोचुण लगा कि “हाँ बारा, अउं



इठि पेहलाई एई गो भुन्ताथ त मेई अपु गी जे दुख कष्ट सेहे, से मोउं न सहेण एन्तेथ।” अब से मेहणु दन रात उंघताथ। तेस जे किछ बि लौतुथ, से तेस जे तठि मेई घेन्तुथ। केहि रोजे बाद, से मेहणु एन्हि कमि केआं बोर भुण लगा।

जपल बि से अपु बछाण पुठा खड़ीणे कोशिश कताथ, त नौखर नौखरणी तेस रोकि छतेथ। ईहांणि कते-कुते सुआ बकत बिती गा।

विषय सूची

मठे मठे तेस मेहणु अब ई आरामे जिन्दगी भरोटू ई लगण लगी। अब स्वर्ग अन्तर तसे मने न लगा लगण। अब से किछ कम करण चहांताथ। यक रोज तेन यमदूत जे बोलु, “अउं अब इस जिन्दगी केआं बोर भोई गो असा त अउं किछ कम करण चहांता।”

यमदूते बोलु,
“तु इठि कम
करणे लिए न,
बल्कि आराम



करण जे भिहो असा। तु बि त ईहांणी जिन्दगी चहांताथ। अब त तु बस असी अपु इच्छा बतांता रिहे। अस तें सोब इच्छा पूरी कते। तेन मेहणु यमदूत केआं माफी मगी त बोलु, “अब में कोई बि इच्छा नेई। अउं अब किछ कम करण चाहांता। अब सोब किछ में समझ एई गोऊ। यमदूते तेस मेहणु जे बोलु, “अब मोउं बि समझा कि तोउ कि तोउ कि समझ आई।” तेन मेहणु बोलु, “मेई एन्हि सोबी केआं एईए समझू कि केसे बि मेहणु कमे टेम कम त आरामे टेम आराम करण चाहिए। एन्हि दुहि अन्तरा यक बि चीज सुआ भोई गई त जिन्दगी मज्जा ई खत्म भोई घेन्ता।

ए मितरा, इस कथाई केआं अउं तुसी ई समझाण चहांता कि अपु कम कदि बि भरोटू ई न समझे त टेम टेम पुठ पुरु करे। तुस जतो मन लाई कइ कमे करियेल, कम ततुरु खरु भुन्तु त कम करण बि ततो मज्जा एन्ता।



विषय सूची

वापस एई गई, निलियार

यक मठड कुआ थिआ, तेस नउ थिउ सिमरन। सिमरने स्कूल यक हफते रोजे छुटी भुई त से अपु नॉन् गी अओ थिआ। सिमरन अपु मॉम सुआ ट्यारा थिआ। से अपु मॉम जुओई रोज के भ्यागे भ्यागे सुआ लम्मी घुमुण जे घेन्ताथ।



यक रोज सिमरन अपु मॉम जुओई घुमुण जे गओ थिआ। हठंते हठंते सिमरने नजर बते ओत यक मठड ई जमून बुटे पुठ गई। तसे ढक अजीब ई

थिआ। ई लगतुथ कि जीं केनि तस बुटे ढक पुठ सुआ जन थशो असा। से बुटे भेएड आ त ध्यान जुओई तेस हेरण लगा। जमून बुटे पुठ सुआ दीमक लगो थिए। बुटा शुखता गओ थिआ। तसे डाई त पन्ने सुआ उदास केण लगो थिए। ई लगतुथ कि जीं बोलुण लगो असे कि “कोऊं जेई असी बचाण दिए, बे कोऊं जेई असी बचाण दिए।”

मॉम सैर कते थोडा अगर घेई गा। तेस लगू कि सिमरन अओरा नेई। तेन पतू खिरक कइ हेरु त सिमरन जे हक दिती ‘ओई! तु बते ओत घेई कइ कि हेरण लगो असा? झठ आई। तें सैर पूरी न भुन्ती त मोउं बि दुकान जे चेरे भुन्तु।’

विषय सूची

सिमरने बोलु, “मामा जी, तुस घिए। अउं पता एन्ता।”
 मामे बोलु, “आई बारा ईए, तें एस शुखो बुटे जुओई कि
 लेणा देणा असा? मोउं पता असा, एस बुटे दिमक लगो
 असे। तु झठ इएर आई।” सिमरने धिक जोरी जुओई
 बोलु, “पर माम जी, हेरे दीमके बझई जुओई ई मठड़ ई
 बुट शुखता गओ असा। एसे डाई त पन्नी के हाल हेरे।”
 मामा जी लेहरी गा त बोलु, “ठीक सी, तु भलाई कता
 रेह त बचांता रेह एस शुखो बुटे। अउं गा सैर करण जे।”



ई बोल कइ माम घेई गा।
 सिमरने इए ओवोर हेरु।
 तेन थोड़े दूर यक शुखो
 लेउड काआँ। तेन से
 लेउड टाता त तसे बेलि
 से पेहले बुटे ढके जन

घराण लगा। से ई हेर कइ हैरान भोई गा कि दीमके
 अन्तर केआं बुटे ढक सुआ खाई गओ थी। से ढोढर भुण
 लगो थिआ। ई लगण लगो थिउ कि जी केनि से मठड़
 बुटा झेउटे बइ कटण लओ असा। सिमरन ई हेर कइ त
 हऊ बि सुआ हैरान भोई गा कि दिमके बुटे ढक केआं
 अन्तरी अन्तरी बइ खड़ी तकर घेण अपु अपु खुली बत
 बडाओ थी। दीमके ई करीगिरी हेर कइ सिमरन हैरान
 परेशान भोई गा। सिमरन बुटे ढक जुओई चिपको जन
 लेउडे बइ घरांता रिहा। सुआ दीमक भीं झड़ गओ थी।
 थोडु ई चरे सिमरने मामे दोस्त बलदेव बि सैर कते कते
 तठि पुजा। तेनि सिमरन पिछाण छड़ा। से बि तसे भेएड़
 एई गा। तेन बि यक लोडूड़ टातु त जेठि तकर सिमरने
 हथ न पुजतुथ तठि तकर तेन लगो जन त दिमक साफ
 किए। तोउं सिमरने माम सैर कर कइ वापस एई गा। तेन
 हेरु कि सिमरन जुओई तसे दोस्त बलदेव बि दिमक
 घराण लगो थिआ।


विषय सूची

तोउं सिमरने मामे हसाण कर कइ अपु दोस्ते जे बोलु, 'बलदेव जी, तु बि सिमरने ई बेकार कम अन्तर पड़ी गा ना? आज सैर करण बिसरी गा ना तु? बलदेवे तेस जुओई हथ मियांते मियांते बोलु। "प्रकाश जी, प्रकृति बचाण सुआ पुन्य कम असु। अस हर रोज सैर करण जे इन बइ घेन्ते। पर असी कदी सोचो असु ना कि अस इन्हि बुटी के बझई जुओई जीन्ते असे। जे कम असी करुण चाहिए थिउ, से इन कोईए किउ। तें भाणेजे अपु सैर करीण छड़ दी कइ इस मठड़ बुटे धे दुबारी जिन्दगी दिती, अउं एस शाबाशी देन्ता।" प्रकाश अपु दोस्ते बोक शुण कइ लज्जेई गा। अपल तकर तेन्हि बुटा पूरा साफ कइ छओ थिआ।

शुई केआं खड़ स्कूल खुलण लगो थिए। तोउं त सिमरन अपु गी जे वापस घेई गओ थिआ। हेउस सिमरने मामे बाजार केआं दिमके दवा अहणती त पणि जुओई मियाई कइ जमून बुटे ढक अन्तर छटकाइ छड़ी।



दुई मेहने बाद जपल सिमरन फि अपु नॉनू गी आ त ई हर कइ खुश भोई गा कि जमून बुटे पुठ नीलू भुओ थियु। तसे डाई त पन्ने बियारी बेलिए हिलण लगो थिए। सिमरन जमून बुटे भेएड़ घेई कइ तेस यक टख हेरण लगो थिआ। तेस लगु कि हिलती डाई त पन्ने तेस जे बोलुण लगो असे, 'धन्यवाद सिमरन।' सिमरने चेहरा खिल गओ थिआ।



विषय सूची

तुबारि मासिक पत्रिका

- तुबारि मासिक पत्रिका ई उम्मीद करुं लगे असे कि एण बाड़े रोज अन्तर सुआ मेहणु इस कम अन्तर साथोट देन्ते।
- इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पांगी घाटि अन्तर पढुं जे त भाषाई सुहलियत करण जे इ पत्रिका शुरु किओ असी।
- तुबारि यक अवाणिज्यिक पत्रिका भो।
- तुबारि पत्रिका कोई मेहणु] जनजाति] त संस्कृति गलती कढेण जे नेई छपाण लगे। अगर कोई ई सोचता बि त अस जिम्मेवार नेई।
- छपाणे पेहले सोब आर्टिकल दुई टाई पांगेई मेहणु हरालो असे। इ त खुली बोक असी कि पेहलि बार पांगवाड़ि लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।
- आर्टिकल्स ना मिलए, या घाटि मेहणु के साथोट ना मिलए त तुबारि पत्रिका कदी बि बंद भुई सकती।
- कोई चीज छपां असी या नेई छपां जे तुबारि संपादकीय टीम पुरा अधिकार असा।
- अस किलाड़ केन्द्रीय पुस्तकालय, त बजार हरिराम लाले दुकान अन्तर तुबारि ड्रॉप बॉक्स पुठ बि अपुं सझाव ओर आर्टिकल्स रखुं जे सुविधा किओ असी।
- अस सोबी पांगी मेहणु जे हात जोड़ कइ अनुरोध कते कि तुस बि कोई अछा आर्टिकल पुराणि या नोई कथा, कहावत, कविता, त नोई घीत (पागवाड़ी अन्तर लिख कइ छपां जे हेंघे दिए।

तुबारि संपादकीय टीम



9418429574
9418329200
9418411199
9418904168
9459828290



चुटकले

1 मास्टरे यक गभुरु केआं पुछु:-
“बोल, पुराणे जुवाने अन्तर रावणे लंका जे, सुन्ने लंका’ किस बोतेथ’
गभुरु:- सर, किस कि कुम्भकर्ण हमेशा उंघी बिशताथ तोउं त तेस जे ‘सुन्ने लंका’ बोतेथ।



2 यक पंडिते यक कुआ केआं पुछु:- बोल कोईया, सोबी केआं बोडा दान की भुन्ता?
कुआ:- पंडित जी, में बोड बोता कि सोबी केआं बोडा दान मतदान (बोट) भुन्ता।

विषय सूची